



## **OPERASI BERSEPADU PEMANTAUAN PKP 3.0**

### **DUA PREMIS DIARAH TUTUP LANGGAR SYARAT LESEN DAN DUA DIKENAKAN KOMPAUN GAGAL IMBAS MYSEJAHTERA**

Dua premis telah diarahkan tutup hari ini atas kesalahan menjalankan perniagaan berbeza dari syarat lesen dan juga melanggar arahan tutup yang telah dikenakan oleh pihak MPS sebelum ini. Tujuh buah premis juga telah dikenakan kompaun atas pelbagai kesalahan yang melanggar syarat lesen. Kesemua tindakan yang dikenakan adalah dibawah Undang-Undang Kecil Perlesenan Tred, Pemiagaan dan Perindustrian (MPS) 2007.

Tindakan ini diambil oleh pihak MPS pada operasi bersepadu pemeriksaan pematuhan SOP PKP 3.0 yang dijalankan hari ini di kawasan Perindustrian Selayang Utama, Selayang Utama, Batu Caves, Selangor. Operasi dijalankan bagi memantau kepatuhan pemilik perniagaan dan industri terhadap pematuhan SOP Perintah Kawalan Pergerakan (PKP) selain pematuhan kepada syarat lesen perniagaan oleh MPS. Sebanyak 60 premis telah dilawati dimana dari jumlah tersebut 35 premis telah diperiksa dan baki 25 lagi tidak menjalankan operasi.

Operasi yang turut disertai oleh Polis Diraja Malaysia ini turut memeriksa pematuhan peniaga terhadap SOP PKP 3.0 seperti bukti kebenaran beroperasi, pematuhan jumlah pekerja yang hadir di premis, penggunaan aplikasi My Sejahtera, penggunaan pelitup muka, penjarakan sosial dan penyediaan pemeriksaan suhu. Hasil pemeriksaan pihak PDRM, dua pemilik premis telah dikenakan kompaun sebanyak RM1,500 setelah didapati terdapat pekerja mereka gagal mendaftar kehadiran menggunakan aplikasi MySejahtera. Tindakan diambil selaras dengan Akta 342 - Akta Pencegahan Dan Pengawalan Penyakit Berjangkit 1988.

Operasi yang tamat pada jam 12 tengah hari ini diketuai oleh Tuan Haji Azmi bin Ismail, Pengarah Jabatan Penguatkuasa dan Keselamatan, tujuh orang pegawai dari Jabatan Pelesenan, wakil Jabatan Korporat serta 36 orang anggota penguatkuasa dan keselamatan. Turut serta 18 anggota Polis Diraja Malaysia Daerah Gombak yang diketuai oleh ASP Syukri Bin Abu Samah dan empat orang anggota dari Angkatan Tentera Diraja Malaysia.

MPS berharap para peniaga yang mendapat kebenaran untuk menjalankan operasi sepanjang tempoh PKP mematuhi SOP yang telah ditetapkan agar rantaian pandemik Covid-19 dapat diputuskan. MPS bersama rakan agensi juga akan sentiasa membuat pemantauan dari masa ke semasa agar masyarakat tidak terus leka dan tindakan tegas akan dikenakan kepada mereka yang ingkar.

**#TAMAT#**

**Dikeluarkan Oleh:  
En. Ahmad Fauzi Bin Ishak  
Timbalan Pengarah  
Jabatan Korporat**

**B.P Yang Dipertua  
Majlis Perbandaran Selayang**

**10 Jun 2021**